



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下剧本只作参考用途，如欲采用或改编，须先取得作者同意。

Name of School : CARMEL BUNNAN TONG MEMORIAL SECONDARY SCHOOL

学校名称 : 迦密唐宾南纪念中学

Name of Play 剧名 : 雕玉

Script writer 剧作者 : 张柏贤老师

Synopsis 故事大纲 :

文希大学毕业后一直无所事事，某晚她发现邻居梁婆婆的诡异行为，而当晚梁婆婆发生意外，送院时嘱托把一件对象交给孙儿阿博。文希和阿博两位多年不见的朋友，穿梭城市的不同场所寻找线索，盼望能解开梁婆婆留下的谜团……



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下剧本只作参考用途，如欲采用或改编，须先取得作者同意。

第一场

音效： Opening Music

场景： 深夜学校走廊

音效： 爆炸声及玻璃碎裂声

闯关者 A： 小心呀！

闯关者 B： 啱啱爆炸 o 既系生物室！你哋睇吓四楼好大烟。

闯关者 C： 睇黎 Miss Chan 同允行、思贤都玩完喇。

闯关者 A： 思贤……

闯关者 C： 时间无多，仲有几块砌图唔知响边……

音效： 炸弹倒数

恐怖份子： 各位玩家，一齐完成幅砌图就可以过关。仲有 15 分钟，学校入面 o 既炸弹将会全部爆炸。

闯关者 A： 快啲上去睇吓 Miss Chan 佢哋点，行啦！

闯关者 B： 放手啊！搞不定幅砌图过唔到关就无命，我唔想陪葬。

闯关者 C： 呢一关 o 既牌系九筒……筒子系考验团队精神！我哋要一齐去生物室！

音效： 爆炸声

音乐： 「今际之国的闯关者」 opening credit

第二场

场景： 晚间睡房

灯光： 开灯

妹妹： 家姐家姐，今集咁快做完，一心系咪都炸死咗？

文希： 主角点会有事。

妹妹： 过咗呢关，有埋九个圆圈嗰只牌，佢哋争只东咋！

文希： 唔系叫做九个圆圈，系叫九筒。

妹妹： 沉迷赌博，有如倒钱落海呀。储齐咩嘢十三么，啲学生就返到现实世界……

文希： 系十三「么」！有无文化架你曾文恩？

妹妹： 曾文希，乜大学又教到你咁烂赌咩！

文希： 我呢啲叫熟悉社会文化，你唔好不记得家姐大学读边科！麻雀大概响清朝发明，不过好多人比电视剧影响，以为麻雀系由马吊演变而成……

音效： 麻雀声



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下剧本只作参考用途，如欲采用或改编，须先取得作者同意。

文希： 隔离屋梁婆婆呢排做乜日日开枱？
妹妹： 嘈冤巴闭真系好烦嘍！
音效： 打电话声
妹妹： 11点03分喇！打落管理处啱啱好。
文希： 你唔系连梁婆婆都笃灰呀？细个楼上楼下日日都有人打牌架啦，梁婆婆以前成日请我哋食家乡小食，你真系无啲人情味。
妹妹： 你讲咩话？一定系呢排听得太多BTS，职业性失聪！
文希： 仲失忆添，头先食饭啲碗你都仲未洗。
妹妹： 吃火锅咪好嘍，一镬熟碟都洗少几只……
文希： 我先唔要一年四季都烩吓烩吓！香港饮食同娱乐文化就系比你呢啲懒人搅弯晒。
妹妹： 懒得过啲啲人毕业几个月都唔去搵工，哎咁咁香港经济比边个搅弯呢？
文希： 咁搏命搵工都无意思，几努力都唔会改变到经济环境，哎，大学生嗶。
音效： 麻雀声
妹妹： 讲落好耐无见过梁婆婆，以前都见佢栋住支拐杖落街晨运。
文希： 细个去梁婆婆屋企玩，佢成屋都摆满书……
妹妹： 家姐你过黎窗边睇吓！你……你睇吓……
文希： 做乜偷窥梁婆婆屋企？……点解……梁婆婆会一个人自己响度打牌架？
妹妹： 应该唔系同朋友zoom打牌嘍……仲有你睇吓梁婆婆件衫，咁似啲古装剧……
文希： 我喺中史书见过……系清装呀！
梁婆婆： 你哋都打咗三只喇，唔争在啦，西！
姐、妹： 四人归西？[尖叫]
音乐： 恐怖音乐

第三场

场景： 早晨的饭厅
音效： 早晨声音
妈妈： 烂瞓妹，好起身刷牙食早餐。
妹妹： [打呵欠]
文希： 我唔等你喇。阿妈医院寻晚好多嘢做咩？咁晏返黎仲整早餐？
妈妈： 你两个寻晚咁乖一早上床呀？
文希： 煲住剧绣好咗两个吊饰比个客，眼边咪早瞓嘍。
妈妈： 宜家咁多人响IG睇吓相就比钱买货架喇？咁多人欣赏，你就唔好hea吓hea吓，认真做好佢。



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下剧本只作参考用途，如欲采用或改编，须先取得作者同意。

- 文希： 我都系无聊玩吓啫，日本有个微型刺绣大师，连 Chanel 都邀请佢展览件 3D 拉面微刺绣，人哋就真系技惊四座！
- 妹妹： 我话妈咪 o 既早餐先系技惊四座，啲烟肉几香！
- 妈妈： 你哋两只懒瞓猪，寻晚几乎变晒烧肉。隔离梁婆婆煲干水几大烟呀，好彩保安巡楼发现……
- 文希： 梁婆婆无事咁嘛？
- 妈妈： 都仲未清醒，佢自己一个住，我响医院收工返黎咪送番佢入去啰。
- 妹妹： 弊喇家姐，梁婆婆寻晚会唔会真系撞到啲啲嘢……
- 音效： 门钟
- 妹妹： 光天化日搵到上门？家姐，唔驶惊，我手机有圣经 APP……
- 音效： 开门或铁闸声
- 妈妈： 入黎坐吓阿博！仲认唔认得梁婆婆个孙呀文希？你哋小学嗰阵成日一齐玩。
- 文希： 沙士博？
- 阿博： 好多年未见喇文希，你仲记得呢个花名。
- 文希： 你以前好钟意饮沙士汽水咁嘛，我哋成班同学都咁叫你。
- 妈妈： 沙士系经典饮品，我就麻麻地浸味，反而有啲想饮返忌廉沟鲜奶同绿宝橙汁。
- 文希： 沙士博，好似四、五年班你就搬走咗，咁多年都无你消息，唔见你返黎探梁婆婆嘅？
- 妈妈： 阿博跟阿爸阿妈离开咗香港，寻晚梁婆婆入咗医院，紧急联络先搵到佢，佢今日黎想搵你帮手。
- 阿博： 文希，auntie 话你大学读文化研究，可唔可以帮我睇吓呢样嘢？你有无谗到啲咩？
- 文希： 常见 o 既娱乐文化嘍！有华人 o 既地方都有人打麻雀架啦。土地问题咁嘛，宜家香港已经少咗好多人打牌，纳米楼点开枱咁……
- 妹妹： 我知呀！呢只孔雀系叫一索，一心已经有呢只牌！
- 妈妈： 咪站乱歌柄！梁婆婆入院嗰阵，手上面一直握住呢只麻雀……
- 阿博： Auntie 话婆婆醒过一吓，千叮万嘱要将呢只牌交比我，我谗一定有原因。
- 妈妈： 阿女你大学成日读埋啲古怪嘢，毕业嗰阵连盆菜都研究过。你帮手阿博，查吓梁婆婆留低只牌有咩意思。
- 阿博： 唔该你吓文希，我惊呢次系婆婆最后同我讲 o 既说话。
- 文希： 咁我哋试吓啦，你未食嘢假？我带你去一个地方。